

Strìngui e bandierón

carlo dariol

Noialtri *bumer* da boce se jera davvero tanti. Se no no i ne varàe ciamà *bumer*. Se poéa ndar in piazza a qualsiasi ora e senpre se trovéa un sac de tosatei o de boce da zìogar insieme. Se no se zìoghéa a *baeón* se zìoghéa a strìngui o bandieron. Sarà che adess mi vae poc in piazza, o che adess de tosatei ghi n'è pochi, ma mi no li vede pì zìogar a strìngui o bandieron.

A **BANDIERÓN** se frontéa tra de lore do squadre col stess numero de zìogadori, ognuna co 'a so "Bandiera", de sòito el pì veòce de 'a squadra. Scopo del zìogo jera impedir a' "Bandiera" avversaria de far rientro a' tana e far inveze rientrar 'a propria. El canpo da zìogo jera el piazzal davanti ae scuòe vèce (che allora 'e jera 'e *scuòe*, e basta) e 'a tana un retàngo ϵ o disegnà sui sassi co na U quadra che unìa 'e do spaéte dei scaini de accesso al porton de 'a scuòea. Finché 'a Bandiera de 'a squadra no jera partìa i avversari véa da star coi piè sul marciapìe. 'A Bandiera partìa co 'a voéa dal limite del retàngo ϵ o disegnà sui sassi, diretta al pin grande; e pena che 'a se movéa scatéa 'l inseguimento. Co 'a Bandiera jera rivada a un metro dal pin grande j'inseguitori se ferméa, ognun dove che'l jera rivà. Pena che 'a Bandiera tochéa el pin, i avversari poéa ndar fermarla: bastéa tocarla, e là 'a véa da fermarse. Po tochéa a' Bandiera de 'a squadra B partir pal pin grande e 'a squadra A ndar bloccarla. Raramente na Bandiera riussìa a rientrar in Patria al primo giro. Tachéa el secondo giro: dal limite de 'a tana partìa el Secondo de 'a squadra che ndéa a liberar 'a so Bandiera: lo tochéa e tuti do poéa tentar de rientrar in tana, e se 'a Bandiera vegnéa blocàa, el Secondo, se'l jera ancora libero e no'l jera rientrà in tana, el poéa liberarlo da novo; oviamente, tra j'inseguitori, ghe jera chi che fea bea guardia a' Bandiera ferma. Quando tuti do jera stati blocài (o magari el Secondo jera riussìo a rientrar in tana) tochéa al Secondo de chealtra squadra ndar liberar 'a so Bandiera. Quindi partìa el Terzo a liberar i primi do, e a so volta, forse, el saràe stat fermà. Prima o poi una dee do Bandiere riussìa a far rientro a' tana e a far vinza 'a so squadra. So che no l'ho spiegà massa ben ma el jera un zìogo de strategia.

STRÌNGUI jera ancora pì bel. No ho mai capìo parché el se ciamesse cussi, ma allora no vée velleità filologiche. Se zìoghéa a squadre, grandi e picoi, dai oto ai quindese ani, in part a' ciesa, anca diese par squadra. Scelt un criterio par divèrse in do (de sòito i do Capitani féa pari e dispari e i scegléa un a' volta i partecipanti), una dee do squadre contéa fin a zento dentro 'a tana e chealtra ndéa scónderse. Strìngui jera come nascondino (o scondicucc), ma a squadre e a punti. Ho dit "**dentro a' tana**" parché la jera na rientranza de 'a ciesa tra 'e do scarsèe dei do altari, un vano largo tre metri e profondo uno e mezo, in modo che, dentro là, no se poesse spiar chi ndéa scónderse; questi véa comunque modo de veda se un dei contatori butéa fora 'a testa par spiar. Intant che 'a squadra in tana contéa a vose alta, chealtra ndéa scónderse, ognun dove che'l voéa, anca distante: drio el bar, dae



sbare, dadriò el Monumento ai Caduti... par tut el paese. «Vegnén!» zighéa i contatori co i vea finìo de contar, e tuta 'a piazza sentìa; quindi i tachéa a ndar a caccia dei “sconti” (come ancùo 'a zent al Outlet, diràe chi che no ha el senso del umorismo); ogni volta che un dei “cercatori” trovéa un de lori (suponén che'l scont se ciamesse Piero), el zighéa el so nome (“PIERO, PIERO, PIEROOOOO”) in modo che tuti poésse ndar bàterghe 'a tana; ognun che Piero riussìa a tocar prima che'l ndesse bata 'a tana el jera un punto. E qua se vedéa 'e strategie. Se Piero ndéa scondese da sol, al massimo el riussìa a far do punti, el primo tocando quel dei cercatori che lo véa sorpreso o che lu véa sorpreso, e po al massimo 'n altro de quei che coréa a bata 'a tana: eh sì, parché 'a tana (← *vedi foto a sinistra*) jera larga tre metri, e no se riussìa a coverza tut el vano de accesso, per cui se se Piero protegéa un canton chealtri passéa da st'altro, e se'l stea in mezo al vano no'l protegéa né questo né quel e no'l fea gnanca un punto. Perciò el trucco jera de ndar scondese a coppie: é vero che jera pì difizie scondese sul stess buso, ma se in do i vegnéa fora insieme intant che 'a squadra dei “cercatori” jera distante da' tana, i poéa far un sac de punti perché in do i coverzéa tut 'l accesso al vano de 'a tana, un da na banda e un da chealtra, e i avversari, par no farse tocar da tuti do, preferìa farse tocar da uno sol entrando in tana da un canton. Ma dove se poéa scónderse in do senza essar visti? Inte i fossi, dadriò 'a siesa de pini del prete (che el se inrabiéa parché i ghe pestéa 'l ort), dal casèl de 'a ferovia... 'E partìe poéa ndar vanti ore. E ogni nova partìa tuti se ingegnéa a trovar nascondigli mejo. Me ricorde ancora chea volta che Fino, Ossi e Raspa se vea ranpegà e scont tra i aghi dei do pini marittimi in parte a' ciesa (← *vedi foto a sinistra, i pini oggi*), quindi proprio tacai a' tana, ma invisibii, se un no ghe penséa. Quando i cercatori li jera tuti bastanza distanti, li é vegnui zó dai pini come martorei furtivi, e i ha fat na strazaria de punti che la é passàa a' storia (del paese). Da chea volta el



primo posto dove che i cercatori ndea vardar jera sui pini maritimi, ma oviamente l'impresa no la é pì stata ripetùta da nissun.

In ogni caso, a zìogar a stringui, se inparéa na roba: che se te ndéa sconderte da sol te tochéa incontentarte de un punto, ma se te ndéa in compagnia te poéa fàrghene tanti. Par questo 'a zente del me paese, ancora dess, quando che vien certi poìtici in campagna eletoràe, ha l'abitudine de dir: «Poé ndarve sconda... in compagnia, ché magari fé pì punti!»

VOCABOLARIO

bumer = boomer, nati all'epoca del boom delle nascite in Italia, anni 1964-1969

sièsa = siepe

martorèi = piccole martore